

主編 趙曉梅 副主編 土登班瑪

中國密宗大典

中國藏學出版社
新西蘭霍蘭德出版有限公司



漢文篇 第4冊

中國密宗大典

趙
樸
初
題



中國藏學出版社
新西蘭霍蘭德出版有限公司

藏學研究
PDG

大唐新翻護國仁王

懺經卷第十 懺悔

代定皇帝製

皇矣至覺子于元元截有海以般若之舟剪稠林以智慧之劍綿絡六合羅罩十方弘宣也深志廣也大自權與天竺涿沫漢庭行無緣之慈納常樂之域信其博施傾芥城而逾遠仰夫湛寂超言象之又玄五始不究其初一得罔根其本以彼取此何其遠哉朕忝嗣鴻休不承大寶軫推溝以夕惕方徹枕而假寐夫其鎮乾坤遏寇虐和風雨著星辰與物無爲又人艱止不有般若其能已乎朕嘗澡身定泉宅心道祕緬尋龍宮之藏稽合鸞峰之旨懿夫護國實在茲經竊景行於波斯庶闡揚於調御至若高張五忍足明側隱之深永祛衆難寔惟化清之本名假法假心空色空推之於無則境智都寂引之於有迺津梁不窮思與黎蒸共臻實相而緹油貝葉文字參差東夏西天言音訛謬致使古今翻譯清濁不同前後參詳輕重匪一其猶大輅終繼事而增華譬彼堅氷始積水而非腐先之所譯語質未融披讀之流臨文三覆凡諸釋氏良用慨然先聖翹誠玉毫澹慮眞境發揮滿教搜綴缺文詔大德三藏沙門不空推校詳譯未周部卷三藏學究二諦教傳三密遂了宗極伊成字圓裳裳西指汎孟南海影與形對勤

將歲深妙印度之聲明洞中華之韻
予既而梵夾遠貴洪鍾待扣佇延吹
典朕哀纏繫棘悲感霜露捧戴

遺詔不敢怠違延振錫之群英終爲山之九仞開府朝恩
許國以身歸佛以命弼我眞教申夫妙門爰令集京城義
學大德良賁等翰林學士常袞等於大明宮南桃園詳譯
護國般若畢并更寫定密嚴等經握契含毫研精蹟遠曩
者訛略刊定較然昔之沉隱鈎索煥矣足可懸諸日月大
燭昏衢潤之雲雨橫流動植伏願上資仙駕飛慧雲於四
天迥出塵勞躡金蓮於十地朕理昧幽關文慚腐則見推
序述婉撫空懷聊紀之於首篇庶克開于厥後特發皇永
承可推而行之時旃蒙歲木蓮榮月也

仁王護國般若波羅蜜多經卷上

開府儀同三司特進試鴻臚卿肅國公食邑三千戶賜紫贈司空謚大鑒正號大廣智大興善寺三藏沙門不空奉詔譯

序品第一

如是我聞一時佛住王舍城鷲峰山中與大比丘衆千八百人俱皆阿羅漢諸漏已盡無復煩惱心善解脫慧善解脫九智十智所作已辦三假實觀三空門觀有爲功德無爲功德皆悉成就復有比丘尼衆八百人俱皆阿羅漢復有無量無數菩薩摩訶薩實智平等永斷惑障方便善巧起大行願以四攝法饒益有情四無量心普覆一切三明鑒達得五神通修習無邊菩提分法工巧技藝超諸世間深入緣生空無相願出入滅定示現難量摧伏魔怨雙照二諦法眼普見知衆生根四無礙解演說無畏十力妙智雷震法音近無等等金剛三昧如是功德皆悉具足復有無量優婆塞衆優婆夷衆皆見聖諦復有無量修七賢行念處正勤神足根力八勝處十徧處十六心行趣諦現觀復有十六大國王波斯匿王等各與若干千萬眷屬俱復有六欲天王釋提桓因等與其眷屬無量天子俱色四靜慮諸大梵王亦與眷屬無量天子俱諸趣變化無量有情

阿脩羅等若干眷屬俱復有變現十方淨土而現百億師子之座佛坐其上廣宣法要一一座前各現一華是百億華衆寶嚴飾於諸華上一一復有無量化佛無量菩薩四衆八部悉皆無量其中諸佛各各宣說般若波羅蜜多展轉徧徧十方恒沙諸佛國土有如是等諸來大衆各禮佛足退坐一面

爾時世尊初年月八日入大寂靜妙三摩地身諸毛孔放大光明普照十方恒沙佛土是時欲界無量諸天雨衆妙華色界諸天亦雨天華衆色間錯甚可愛樂時無色界雨諸香華香如須彌華如車輪如雲而下徧覆大衆普佛世界六種震動爾時大衆自相謂言大覺世尊前已爲我等說摩訶般若波羅蜜多金剛般若波羅蜜多天王問般若波羅蜜多大品等無量無數般若波羅蜜多今日如來放大光明斯作何事時室羅筏國波斯匿王作是思惟今佛現是希有之相必雨法雨普皆利樂卽問寶蓋無垢稱等諸優婆塞舍利弗須菩提等諸大聲聞彌勒師子吼等諸菩薩摩訶薩言如來所現是何瑞相時諸大衆無能答者波斯匿王等承佛神力廣作音樂欲色諸天各奏無量天諸妓樂聲徧三千大千世界爾時世尊復放無量阿僧祇光其明雜色一一光中現寶

蓮華其華千葉皆作金色上有化佛宣說法要是佛光明
普於十方恒河沙等諸佛國土有緣斯現彼他方佛國中
東方普光菩薩摩訶薩東南方蓮華手菩薩摩訶薩南方
離憂菩薩摩訶薩西南方光明菩薩摩訶薩西方行慧菩
薩摩訶薩西北方寶勝菩薩摩訶薩北方勝受菩薩摩訶
薩東北方離塵菩薩摩訶薩上方喜受菩薩摩訶薩下方
蓮華勝菩薩摩訶薩各與無量百千俱胝菩薩摩訶薩皆
來至此持種種香散種種華作無量音樂供養如來頂禮
佛足默然退坐合掌恭敬一心觀佛

仁王護國般若波羅蜜多經觀如來品第二

爾時世尊從三昧起坐師子座告大衆言吾知十六諸國
王等咸作是念世尊大慈普皆利樂我等諸王云何護國
善男子吾今先爲諸菩薩摩訶薩說護佛果護十地行汝
等皆應諦聽諦聽善思念之是時大衆波斯匿王等聞佛
語已咸共讚言善哉善哉即散無量諸妙寶花於虛空中
變成寶蓋覆諸大衆靡不周徧時波斯匿王即從座起頂
禮佛足合掌長跪而白佛言世尊菩薩摩訶薩云何護佛
果云何護十地行

佛告波斯匿王言護佛果者諸菩薩摩訶薩應如是住教
化一切卵生胎生濕生化生不觀色相不觀色如受想行

識我人知見常樂淨倒四攝六度二諦四諦力無畏等一
切諸行乃至菩薩如來亦復如是不觀相不觀如所以者
何以諸法性即真實故無來無去無生無滅同眞際等法
性無二無別猶如虛空蘊處界相無我我所是爲菩薩摩
訶薩修行般若波羅蜜多

波斯匿王白佛言世尊若菩薩衆生性無二者菩薩以何
相而化衆生耶佛言大王色受想行識常樂我淨法性不
住色不住非色受想行識常樂我淨亦不住淨不住非淨
何以故以諸法性悉皆空故由世諦故由三假故一切有
情蘊處界法造福非福不動行等因果皆有二乘賢聖所
修諸行乃至佛果皆名爲有六十二見亦名爲有大王若
著名相分別諸法六趣四生三乘行果即是不見諸法實
性

波斯匿王白佛言諸法實性清淨平等非有非無智云何
照佛言大王智照實性非有非無所以者何法性空故是
卽色受想行識十二處十八界士夫六界十二因緣二諦
四諦一切皆空是諸法等卽生卽滅卽有卽空利那利那
亦復如是以故一念中有九十剎那一剎那經九百生
滅諸有爲法悉皆空故以甚深般若波羅蜜多照見諸法
一切皆空內空空外空空內外空空大空勝義空有爲空無

爲空無始空畢竟空散空本性空自相空一切法空般若波羅蜜多空因空佛果空空故空諸有爲法法集故有受集故有名集故有因集故有果集故有六趣故有十地故有佛果故有一切皆有善男子若菩薩住於法相有我相人相有情知見爲住世間卽非菩薩所以者何一切諸法悉皆空故若於諸法而得不動不生不滅無相無無相不應起見何以故一切法皆如也諸佛法僧亦如也聖智現前最初一念具足八萬四千波羅蜜多名歡喜地障盡解脫運載名乘動相滅時名金剛定體相平等名一切智智

大王此般若波羅蜜多文字章句百佛千佛百千萬億一切諸佛而共同說若有人於恒河沙三千大千世界滿中七寶以用布施大千世界一切有情皆得阿羅漢果不如有人於此經中乃至起於一念淨信何況有能受持讀誦解一句者所以者何文字性離無文字相非法非非法般若空故菩薩亦空何以故於十地中地地皆有始生住生及以終生此三十生悉皆是空一切智智亦復皆空大王若菩薩見境見智見說見受卽非聖見是愚夫見有情果報三界虛妄欲界分別所造諸業色四靜慮定所作業無色四空定所起業三有業果一切皆空三界根本無明亦

空聖位諸地無漏生滅於三界中餘無明習變易果報亦復皆空等覺菩薩得金剛定二死因果空一切智亦空佛無上覺種智圓滿擇非擇滅眞淨法界性相平等應用亦空善男子若有修習般若波羅蜜多說者聽者譬如幻土無說無聽法同法性猶如虛空一切法皆如也大王菩薩摩訶薩護佛果爲若此

爾時世尊告波斯匿王言汝以何相而觀如來波斯匿王言觀身實相觀佛亦然無前際無後際無中際不住三際不離三際不住五蘊不離五蘊不住四大不離四大不住六處不離六處不住三界不離三界不住方不離方明無明等非一非異非此非彼非淨非穢非有爲非無爲無自相無他相無名無相無強無弱無示無說非施非慳非戒非犯非忍非恚非進非怠非定非亂非智非愚非來非去非入非出非福田非不福田非相非無相非取非捨非大非小非見非聞非覺非知心行處滅言語道斷同眞際等法性我以此相而觀如來佛言善男子如汝所說諸佛如來力無畏等恒沙功德諸不共法悉皆如是修般若波羅蜜多者應如是觀若他觀者名爲邪觀說是法時無量大衆得法眼淨

仁王護國般若波羅蜜多經菩薩行品第三

爾時波斯匿王白佛言世尊護十地行菩薩摩訶薩應云何修行云何化衆生復以何相而住觀察

佛告大王諸菩薩摩訶薩依五忍法以爲修行所謂伏忍信忍順忍無生忍皆上中下於寂滅忍而有上下名爲菩薩修行般若波羅蜜多善男子初伏忍位起習種性修十住行初發心相有恒河沙衆生見佛法僧發於十信所謂信心念心精進心慧心定心不退心戒心願心護法心迴向心具此十心而能少分化諸衆生超過二乘一切善地是爲菩薩初長養心爲聖胎故

復次性種性菩薩修行十種波羅蜜多起十對治所謂觀察身受心法不淨諸苦無常無我治貪瞋癡三不善根起施慈悲三種善根觀察三世過去因忍現在因果忍未來果忍此位菩薩廣利衆生超過我見人見衆生等想外道倒想所不能壞

復次道種性菩薩修十回向起十忍心謂觀五蘊色受想行識得戒忍定忍慧忍解脫忍解脫知見忍觀三界因果得空忍無想忍無願忍觀二諦假實諸法無常得無常忍一切法空得無生忍此位菩薩作轉輪王能廣化利一切衆生

復次信忍菩薩謂歡喜離地垢地發光地能斷三障色煩

惱縛行四攝法布施愛語利行同事修四無量慈無量心悲無量心喜無量心捨無量心具四弘願斷諸纏蓋常化衆生修佛知見成無上覺住三脫門空解脫門無相解脫門無願解脫門此是菩薩摩訶薩從初發心至一切智諸行根本利益安樂一切衆生

復次順忍菩薩謂焰慧地難勝地現前地能斷三障心煩惱縛能於一身徧往十方億佛刹土現不可說神通變化利樂衆生

復次無生忍菩薩謂遠行地不動地善慧地能斷三障色心習氣而能示現不可說身隨類饒益一切衆生

復次寂滅忍者佛與菩薩同依此忍金剛喻定住下忍位名爲菩薩至於上忍名一切智觀勝義諦斷無明相是爲等覺一相無相平等無二爲第十一一切智地非有非無湛然清淨無來無去常住不變同眞際等法性無緣大悲常化衆生乘一切智乘來化三界善男子諸衆生類一切煩惱業異熟果二十二根不出三界諸佛示導應化法身亦不離此若有說言於三界外別更有一衆生界者卽是外道大有經說大王我常語諸衆生但斷三界無明盡者卽名爲佛自性清淨名本覺性卽是諸佛一切智智由此得爲衆生之本亦是諸佛菩薩行本是爲菩薩本所修行

五忍法中十四忍也

佛言大王汝先問言菩薩云何化衆生者菩薩摩訶薩應如是化從初一地至後一地自所行處及佛行處一切知見故若菩薩摩訶薩住百佛刹作瞻部洲轉輪聖王修百法明門以檀波羅蜜多住平等心化四天下一切衆生若菩薩摩訶薩住千佛刹作忉利天王修千法明門說十善道化一切衆生若菩薩摩訶薩住萬佛刹作夜摩天王修萬法明門依四禪定化一切衆生若菩薩摩訶薩住億佛刹作觀史多天王修億法明門行菩提分法化一切衆生若菩薩摩訶薩住百億佛刹作化樂天王修百億法明門二諦四諦化一切衆生若菩薩摩訶薩住千億佛刹作他化自在天王修千億法明門十二因緣智化一切衆生若菩薩摩訶薩住萬億佛刹作初禪梵王修萬億法明門方便善巧智化一切衆生若菩薩摩訶薩住百萬微塵數佛刹作二禪梵王修百萬微塵數法明門雙照平等神通願智化一切衆生若菩薩摩訶薩住百萬億阿僧祇微塵數佛刹作三禪梵王修百萬億阿僧祇微塵數法明門以四無礙智化一切衆生若菩薩摩訶薩住不可得不可說佛刹作第四禪大梵天王爲三界王修不可說不可說法明門得理盡三昧同佛行處盡三界原普利衆生如佛境

界是爲菩薩摩訶薩現諸王身化導之事十方如來亦復如是證無上覺常徧法界利樂衆生

爾時一切大衆卽從座起散不可說華焚不可說香供養恭敬稱讚如來時波斯匿王卽於佛前以偈讚曰

世尊導師金剛體

八辯圓音爲開演

天人俱修出離行

五忍功德妙法門

三賢十聖忍中行

佛法衆海三寶藏

十善菩薩發大心

中下品善粟散王

習種銅輪二天下

道種堅德轉輪王

伏忍聖胎三十人

三世諸佛於中學

一切菩薩行根本

若得信心必不退

化利自他悉平等

歡喜菩薩轉輪王

心行寂滅轉法輪

時衆得道百萬億

能習一切菩薩道

十四菩薩能諦了

唯佛一人能盡原

無量功德於中攝

長別三界苦輪海

上品十善鐵輪王

銀輪三天性種性

七寶金輪四天下

十住十行十迴向

無不由此伏忍生

是故發信心心難

進入無生初地道

定名菩薩初發心

初照二諦平等理

權化有情遊百國
入理般若名爲住
初住一心具衆德
離垢菩薩初利王
戒足清淨悉圓滿
無相無緣眞實性
發光菩薩夜摩王
善能通達三摩地
歡喜離垢與發光
具觀一切身口業
焰慧菩薩大精進
實智寂滅方便智
難勝菩薩得平等
空空諦觀無二相
現前菩薩自在王
勝義智光能徧滿
焰慧難勝現前地
空慧寂然無緣觀
遠行菩薩初禪王
方便善巧悉平等

檀施清淨利群生
住生德行名爲地
於勝義中而不動
現形六趣千國土
永離誤犯諸過失
無體無生無二照
應形往萬諸佛刹
隱顯自在具三明
能滅色縛諸煩惱
法性清淨照皆圓
觀史天王遊億刹
達無生理照空有
化樂天王百億國
垂形六趣靡不周
照見緣生相無二
往千億土化衆生
能斷三障迷心惑
還照心空無量境
住於無相無生忍
常萬億土化群生

進入不動法流地
常觀勝義照無二
順道法愛無明習
不動菩薩二禪王
能於百萬微塵刹
悉知三世無量劫
善慧菩薩三禪王
常在無爲空寂行
法雲菩薩四禪王
始入金剛一切了
寂滅忍中下忍觀
不動善慧法雲地
無明習相識俱轉
正覺無相徧法界
寂照無爲眞解脫
湛然不動常安隱
三賢十聖住果報
一切有情皆暫住
如來三業德無量
法王無上人中樹

永無分段超諸有
二十一生空寂行
遠行大士獨能斷
得變易身常自在
隨其形類化衆生
於第一義而不動
能於千恒一時現
恒沙佛藏一念了
於億恒土化群生
二十九生永已度
一轉妙覺無等等
除前所有無明習
二諦理圓無不盡
三十生盡智圓明
大悲應現無與等
光明徧照無所照
唯佛一人居淨土
登金剛原常不動
隨諸衆生等憐愍
普蔭大衆無量光

口常說法非無義

人中師子爲演說

塵沙刹土悉震動

世尊善說十四王

心智寂滅無緣照

甚深句義未曾有

大眾歡喜皆蒙益

是故我今頭面禮

爾時百萬億恒河沙大眾聞佛世尊及波斯匿王說十四忍無量功德獲大法利聞法悟解得無生忍入於正位爾時世尊告大眾言是波斯匿王已於過去十千劫龍光王佛法中爲四地菩薩我爲八地菩薩今於我前大師子吼如是如是如汝所說得真實義不可思議唯佛與佛乃知斯事

善男子此十四忍諸佛法身諸菩薩行不可思議不可稱量何以故一切諸佛皆於般若波羅蜜多中生般若波羅蜜多中化般若波羅蜜多中滅而實諸佛生無所生化無所化滅無所滅第一無二非相非無相無自無他無來無去如虛空故善男子一切衆生性無生滅由諸法集幻化而有蘊處界相無合無散法同法性寂然空故一切衆生自性清淨所作諸行無縛無解非因非果非不因果諸苦受行煩惱所知我相人相知見受者一切空故法境界空空無相無作不順顛倒不順幻化無六趣相無四生相無聖人相無三寶相如虛空故善男子甚深般若無知無見

不行不緣不捨不受正住觀察而無照相行斯道者如虛空故法相如是有所得心無所得心皆不可得是以般若非卽五蘊非離五蘊非卽衆生非離衆生非卽境界非離境界非卽行解非離行解如是等相不可思量是故一切菩薩摩訶薩所修諸行未至究竟而於中行一切諸佛知如幻化得無住相而於中化故十四忍不可思量善男子汝今所說此功德藏有大利益一切衆生假使無量恒河沙數十地菩薩說是功德百千億分如海一滴三世諸佛如實能知一切賢聖悉皆稱讚是故我今略述所說少分功德

善男子此十四忍十方世界過去現在一切菩薩之所修行一切諸佛之所顯示未來諸佛菩薩摩訶薩亦復如是若佛菩薩不由此門得一切智者無有是處何以故諸佛菩薩無異路故善男子若人聞此住忍行忍迴向忍歡喜忍離垢忍發光忍焰慧忍難勝忍現前忍遠行忍不動忍善慧忍法雲忍正覺忍能起一念清淨信者是人超過百劫千劫無量無邊恒河沙劫一切苦難不生惡趣不久當得阿耨多羅三藐三菩提是時十億同名虛空藏菩薩摩訶薩與無量無數諸來大眾歡喜踴躍承佛威神普見十方恒沙諸佛各於道場說十四忍如我世尊所說無異各

各歡喜如說修行般若波羅蜜多

爾時世尊告波斯匿王汝先問云復以何相而住觀察菩薩摩訶薩應如是觀以幻化身而見幻化正住平等無有彼我如是觀察化利衆生然諸有情於久遠劫初刹那識異於木石生得染淨各自能爲無量無數染淨識本從初刹那不可說劫乃至金剛終一刹那有不可說不可說識生諸有情色心二法色名色蘊心名四蘊皆積聚性隱覆眞實大王此一色法生無量色眼得爲色耳得爲聲鼻得爲香舌得爲味身得爲觸堅持名地津潤名水煖性名火輕動名風生五識處名五色根如是展轉一色一心生不可說無量色心皆如幻故善男子有情之受依世俗立若有若無但生有情妄想憶念作業受果皆名世諦三界六趣一切有情婆羅門刹帝利毗舍首陀我人知見色法心法如夢所見善男子一切諸名皆假施設佛未出前世諦幻法無名無義亦無體相無三界名善惡果報六趣名字諸佛出現爲有情故說於三界六趣染淨無量名字如是一切如呼聲響諸法相續念念不住刹那刹那非一非異速起速滅非斷非常諸有爲法如陽焰故諸法相待所謂色界眼界眼識界乃至法界意界意識界猶如電光不定相待有無一異如第二月諸法緣成蘊處界法如水上泡

諸法因成一切有情俱時因果異時因果三世善惡如空中雲善男子菩薩摩訶薩住無分別無彼此相無自他相常行化利無化利相是故應知愚夫垢識染著虛妄爲相所縛菩薩照見知如幻士無有體相但如空華是爲菩薩摩訶薩住利自他如實觀察說是法時會中無量人天大衆有得伏忍空無生忍一地二地乃至十地無量菩薩得一生補處

仁王護國般若波羅蜜多經二諦品第四

爾時波斯匿王白佛言世尊勝義諦中有世俗諦不若言無者智不應二若言有者智不應一一二之義其事云何佛言大王汝於過去龍光王佛法中已問此義我今無說汝今無聽無說無聽是即名爲一義二義汝今諦聽當爲汝說

爾時世尊即說偈言

無相勝義諦	體非自他作	因緣如幻有
亦非自他作	法性本無性	勝義諦空如
諸有幻有法	三假集假有	無無諦實無
寂滅勝義空	諸法因緣有	有無義如是
有無本自二	譬如牛二角	照解見無二
二諦常不即	解心見無二	求二不可得

非謂二諦一

一亦不可得

於解常自一

於諦常自二

了達此一二

眞入勝義諦

世諦幻化起

譬如虎空華

如影如毛輪

因緣故幻有

幻化見幻化

愚夫名幻諦

幻師見幻法

諦幻悉皆無

若了如是法

卽解一二義

徧於一切法

應作如是觀

大王菩薩摩訶薩住勝義諦化諸有情佛及有情一而無二何以故有情菩提此二皆空以有情空得置菩提空以菩提空得置有情空以一切法空空故空何以故般若無相二諦皆空謂從無明至一切智無自相無他相於第一義見無所見若有修行亦不取著若不修行亦不取著非行非不行亦不取著於一切法皆不取著菩薩未成佛以菩提爲煩惱菩薩成佛時以煩惱爲菩提何以故於第一義而無二故諸佛如來與一切法悉皆如故波斯匿王白佛言十方諸佛一切菩薩云何不離文字而行實相佛言大王文字者謂契經應頌記別諷誦自說緣起譬喻本事本生方廣希有論議所有宣說音聲語言文字章句一切皆如無非實相若取文字相者卽非實相大王修實相者如文字修實相卽是諸佛智母一切有情根本智母此卽名爲一切智體諸佛未成佛與當佛爲智母諸佛已成佛

卽爲一切智未得爲性已得爲智三乘般若不生不滅自

性常住一切有情此爲覺性若菩薩不著文字不離文字無文字相非無文字能如是修不見修相是卽名爲修文字者而能得於般若眞性是爲般若波羅蜜多大王菩薩摩訶薩護佛果護十地行護化有情爲若此也

波斯匿王白佛言眞性是一有情品類根行無量法門爲一爲無量耶佛言大王法門非一亦非無量何以故由諸有情色法心法五取蘊相我人知見種種根行品類無邊法門隨根亦有無量此諸法性非相非無相而非無量若菩薩隨諸有情見一見二是卽不見一二之義了知一二非一非二卽勝義諦取著一二若有若無卽世俗諦是故法門非一非二

大王一切諸佛說般若波羅蜜多我今說般若波羅蜜多無二無別汝等大衆受持讀誦如說修行卽爲受持諸佛之法大王此般若波羅蜜多功德無量若有恒河沙不可說諸佛是一一佛教化無量不可說有情是一一有情皆得成佛是諸佛等復教化無量不可說有情亦皆成佛是諸佛等所說般若波羅蜜多有無量不可說那庾多億偈說不可盡於諸偈中而取一偈分爲千分復於千分而說一分句義功德尙無窮盡何況如是無量句義所有功德

若有人能於此經中起一念淨信是人即超百劫千劫百千萬劫生死苦難何況書寫受持讀誦爲人解說所得功德即與十方一切諸佛等無有異當知此人諸佛護念不久當成阿耨多羅三藐三菩提是法時有十億人得三空忍百萬億人得大空忍無量菩薩得住十地

仁王護國般若波羅蜜多經卷上
丙午歲高麗國大藏都監奉
敕雕造

初校 虎山
二校 誠譽
三校 格圖

仁王護國般若波羅蜜多經卷下

開府儀同三司特進試鴻臚卿肅國公食邑三千戶賜紫贈司空謚大鑒正號大廣智大興善寺三藏沙門不空奉詔譯

護國品第五

爾時世尊告波斯匿王等諸大國王諦聽諦聽我爲汝等說護國法一切國土若欲亂時有諸災難賊來破壞汝等諸王應當受持讀誦此般若波羅蜜多嚴飾道場置百佛

像百菩薩像百師子座請百法師解說此經於諸座前然種種燈燒種種香散諸雜華廣大供養衣服臥具飲食湯藥房舍床座一切供事每日二時講讀此經若王大臣比丘比丘尼優婆塞優婆夷聽受讀誦如法修行災難即滅大王諸國土中有無量鬼神一一復有無量眷屬若聞是經護汝國土若國欲亂鬼神先亂鬼神亂故即萬人亂當有賊起百姓喪亡國王太子百官互相是非天地變怪日月衆星失時失度大火大水及大風等是諸難起皆應受持講說此般若波羅蜜多若於是經受持讀誦一切所求官位富饒男女慧解行來隨意人天果報皆得滿足疾疫厄難即得除愈杻械枷鎖繫其身皆得解脫破四重戒作五逆罪及毀諸戒無量過咎悉得消滅大王往昔過去釋提桓因爲頂生王領四軍衆來上天宮欲滅帝釋時彼天主即依過去諸佛教法敷百高座請百法師講讀般若波羅蜜多經頂生即退天衆安樂大王昔天羅國王有一太子名曰斑足登王位時有外道師名爲善施與王灌頂乃令斑足取千王頭以祀塚間摩訶迦羅大黑天神自登王位已得九百九十九王唯少一王北行萬里乃得一王名曰普明其普明王白斑足言願聽一日禮敬三寶飯食沙門斑足聞已即便許之其王乃

依過去諸佛所說教法敷百高座請百法師一日二時講說般若波羅蜜多八千億偈時彼衆中第一法師爲普明王而說偈言

劫火洞然 大千俱壞 須彌巨海 磨滅無餘
梵釋天龍 諸有情等 尙皆殄滅 何況此身
生老病死 憂悲苦惱 怨親逼迫 能與願違
愛欲結使 自作瘡疣 三界無安 國有何樂
有爲不實 從因緣起 盛衰電轉 暫有卽無
諸界趣生 隨業緣現 如影如響 一切皆空
識由業漂 乘四大起 無明愛縛 我我所生
識隨業遷 身卽無主 應知國土 幻化亦然
爾時法師說此偈已時普明王聞法悟解證空三昧王諸眷屬得法眼空其王卽便詣天羅國諸王衆中而作是言仁等今者就命時到悉應誦持過去諸佛所說般若波羅蜜多偈諸王聞已亦皆悟解得空三昧各各誦持時斑足王問諸王言汝等今者皆誦何法爾時普明卽以上偈答斑足王王聞是法亦證空定歡喜踊躍告諸王言我爲外道邪師所誤非汝等答汝各還國當請法師解說般若波羅蜜多時斑足王以國付弟出家爲道得無生法忍

大王過去復有五千國王常誦此經現生獲報汝等十六諸大國王修護國法應當如是受持讀誦解說此經若未來世諸國王等爲欲護國護自身者亦應如是受持讀誦解說此經說是法時無量人衆得不退轉阿脩羅等得生天上無量無數欲色諸天得無生忍

仁王護國般若波羅蜜多經不思議品第六

爾時十六國王及諸大衆聞佛說此般若波羅蜜多甚深句義歡喜踊躍散百萬億衆寶蓮花於虛空中成寶華座十方諸佛無量大衆共坐此座說般若波羅蜜多是諸大衆持十千金蓮華散釋迦牟尼佛上合成華輪蓋諸大衆復散八萬四千芬陀利華於虛空中成白雲臺臺中光明王佛與十方諸佛無量大衆演說般若波羅蜜多是諸大衆持曼陀羅華散釋迦牟尼佛及諸衆會復散曼殊沙華於虛空中變作金剛寶城城中師子奮迅王佛共十方諸佛大菩薩衆演說勝義般若波羅蜜多復散無量天諸妙華於虛空中成寶雲蓋徧覆三千大千世界是華蓋中雨恒河沙華從空而下

時波斯匿王及諸大衆見是事已歎未曾有合掌向佛而作是言願過去現在未來諸佛常說般若波羅蜜多願諸衆生常得見聞如我今日等無有異佛言大王如汝所說

此般若波羅蜜多是諸佛母諸菩薩母不共功德神通生處諸佛同說能多利益是故汝等常應受持

爾時世尊爲諸大衆現不可思議神通變化一華入無量華無量華入一華一佛土入無量佛土無量佛土入一佛土一塵刹土入無量塵刹土無量塵刹土入一塵刹土無量大海入一毛孔無量須彌入芥子中一佛身入無量衆生身無量衆生身入一佛身大復現小小復現大淨復現穢穢復現淨佛身不可思議衆生身不可思議乃至世界不可思議當佛現此神變之時十千女人現轉女身得神通三昧無量天人得無生法忍無量阿脩羅等成菩薩道恒河沙菩薩現身成佛

仁王護國般若波羅蜜多經奉持品第七

爾時波斯匿王觀佛神變見千華臺上徧照如來千華葉上千化身佛千華葉中無量諸佛各說般若波羅蜜多白佛言世尊如是無量般若波羅蜜多不可思議不可智知云何諸善男子於此經中明了覺解爲人演說佛言大王汝今諦聽從初習忍至金剛定如法修行十三觀門皆爲法師依持建立汝等大衆應當如佛而供養之百千萬億天妙香華而以奉上

善男子其法師者習種性菩薩若比丘比丘尼優婆塞優

婆夷修十住行見佛法僧發菩提心於諸衆生利樂悲愍

自觀已身六界諸根一切無常苦空無我了知業行生死

涅槃能利自他饒益安樂聞讚佛毀佛心定不動聞有佛

無佛心定不退三業無失起六和敬方便善巧調伏衆生

勤學十智神通化利下品修習八萬四千波羅蜜多善男

子習忍以前經十千劫行十善行有退有進譬如輕毛隨

風東西若至忍位入正定聚不作五逆不謗正法知我法

相悉皆空故住解脫位於一阿僧祇劫修習此忍能起勝

行復次性種性菩薩住無分別修十慧觀捨財命故持淨

戒故心謙下故利自他故生死無亂故無相甚深故達有

如幻故不求果報故得無礙解故念念示現佛神力故對

治四倒三不善根三世惑業十顛倒故我人知見念念虛

僞了達名假受假法假皆不可得無自他相住真實觀中

品修習八萬四千波羅蜜多於二阿僧祇劫行諸勝行得

堅忍位

復次道種性菩薩住堅忍中觀諸法性得無生滅四無量

心能破諸闇常見諸佛廣興供養常學諸佛住迴向心所

修善根皆如實際能於三昧廣作佛事現種種身行四攝

法住無分別化利衆生智慧明了甚深觀察一切行願普

皆修習能爲法師調御有情善觀五蘊三界二諦無自他

相得如實性雖常修勝義而受生三界何以故業習果報未壞盡故於人天中順道生故上品修習八萬四千波羅蜜多三阿僧祇劫修二利行廣大饒益得善調伏諸三摩地住勝觀察修出離行能證平等聖人地故

復次歡喜地菩薩摩訶薩超愚夫地生如來家住平等忍初無相智照勝義諦一相平等非相無相斷諸無明滅三界貪未來無量生死永不生故大悲爲首起諸大願於方便智念念修習無量勝行非證非不證一切徧學故非住非不住向一切智故行於生死魔不動故離我我所無怖畏故無自他相常化衆生故自在願力生諸淨土故善男子此初覺智非如非智非有非無無有二相方便妙用非倒非住非動非靜二利自在如水與波非一非異智起諸波羅蜜多亦非一異於四阿僧祇劫滿足修習百萬行願此地菩薩無三界業習更不造新由隨智力以願生故念念常行檀波羅蜜多布施愛語利行同事廣大清淨善能安住饒益衆生

復次離垢地菩薩摩訶薩四無量心最勝寂滅斷瞋等習修一切行所謂遠離殺害不與不取心無染欲得真實語得和合語得柔軟語得調伏語常行捨心常起慈心住正直心寂靜純善離破戒垢行大慈觀念念現前於五阿僧

祇劫具足清淨戒波羅蜜多志意勇猛永離諸染

復次發光地菩薩摩訶薩住無分別滅無明闇於無相忍而得三明悉知三世無來無去依四靜慮四無色定無分別智次第隨順具足勝定得五神通現身大小隱顯自在天眼清淨悉見諸趣天耳清淨悉聞衆聲以他心智知衆生心宿住能知無量差別於六阿僧祇劫行一切忍波羅蜜多得大總持利益安樂

復次焰慧地菩薩摩訶薩修行順忍無所攝受永斷微細身邊見故修習無邊菩提分法念處正勤神足根力覺道具足爲欲成就力無所畏不共佛法於七阿僧祇劫修習無量精進波羅蜜多遠離懈怠普利衆生

復次難勝地菩薩摩訶薩以四無畏隨順眞如清淨平等無差別相斷隨小乘樂求涅槃集諸功德具觀諸諦此苦聖諦集滅道諦世俗勝義觀無量諦爲利衆生習諸技藝文字醫方讚詠戲笑工巧呪術外道異論吉凶占相一無錯謬但於衆生不爲損惱爲利益故咸悉開示漸令安住無上菩提知諸地中出道障道於八阿僧祇劫常修三昧開發諸行

復次現前地菩薩摩訶薩得上順忍住三脫門能盡三界集因集業盡現行相大悲增上觀諸生死無明闇覆業集

識種名色六處觸受愛取有生老死等皆由著我無明業果非有非無一相無相而不一故於九阿僧祇劫行百萬空無相無願三昧得一切般若波羅蜜多無邊光照

復次遠行地菩薩摩訶薩修無生忍證法無別斷諸業果細現行相住於滅定起殊勝行雖常寂滅廣化衆生示入聲聞常隨佛智示同外道示作魔王隨順世間而常出世於十阿僧祇劫行百萬三昧善巧方便廣宣法藏一切莊嚴皆得圓滿

復次不動地菩薩摩訶薩住無生忍體無增減斷諸功用心心寂滅無身心相猶如虛空此菩薩佛心菩提心涅槃心悉皆不起由本願故諸佛加持能一念頃而起智業雙照平等以十力智徧不可說大千世界隨諸衆生普皆利樂於千阿僧祇劫滿足百萬大願心心趣入一切種一切智智復次善慧地菩薩摩訶薩住上無生忍滅心心相證智自在斷無障礙具大神通修力無畏善能守護諸佛法藏得無礙解法義詞辯演說正法無斷無盡一刹那頃於不可說諸世界中隨諸衆生所有問難一音解釋普令歡喜於萬阿僧祇劫能現百萬恒河沙等諸佛神力無盡法藏利益圓滿

復次法雲地菩薩摩訶薩無量智慧思惟觀察從發信心

經百萬阿僧祇劫廣集無量助道法增長無邊大福智證業自在斷神通障於一念頃能徧十方百萬億阿僧祇世界微塵數國土悉知一切衆生心行上中下根爲說三乘普令修習波羅蜜多人佛行處力無所畏隨順如來寂滅轉依善男子從初習忍至金剛定皆名爲伏一切煩惱無相信忍照勝義諦滅諸煩惱生解脫智漸漸伏滅以生滅心得無生滅此心若滅即無明滅金剛定前所有知見皆不名見唯佛頓解具一切智所有知見而得見善男子金剛三昧現在前時而亦未能等無等等譬如有人登大高臺普觀一切無不斯了若解脫位一相無相無生無滅同眞際等法性滿功德藏住如來位善男子如是諸菩薩摩訶薩受持解說皆往十方諸佛刹土利安有情通達實相如我今日等無有異善男子十方世界一切如來皆依此門而得成佛若言越此得成佛者是魔所說非是佛說是故汝等應如是知如是見如是信解爾時世尊欲重宣此義而說偈言

彼伏忍菩薩

於佛法長養

堅固三十心

名爲不退轉

初證平等性

而生諸佛家

由初得覺悟

名爲歡喜地

遠離於染汙

瞋等種種垢

具戒德清淨

名爲離垢地